

ISYOX CARTA YA' SAN JUAN

Kaw k'ul istzotel ya' Juan yinh juxhta Gayo

¹Hanin icham winaj inti'an, chintz'ib'nhetojan hune' carta ti' tawet, wuxhta Gayo, yinh kaw yeli xahan ayach wuhan.

²Wuxhtaj, hach xahan ay wuhan, kaw chinq'anant tet Komam Dios tato haka' isk'ulal hawehiko yinh tzet yet Komam Dios, hak tu' xin isk'ulal chi'ek'paxo hawu. Chinq'annipaxojan ta kawachnhetik'apaxoj. ³Kaw kintzalahan yet wab'enan yalni eb'naj juxhta hulik'oj tato kaw yijem hach yinh isk'ulal Komam, yeb'paxo xin tzujan hach yinh isyelal. ⁴Kaw ek'na chitzalakano wanmahan yet chiwab'enan tato kaw yijem wuninalan.

⁵Wuxhtaj, kaw k'ulnhe hayijen munil yinh hakolwa yinh eb'naj juxhtaj, hakpax tu' xin yinh eb'naj juxhta nan konhob'al chi'ek' tak'atanh. ⁶Yet kutxanonhikojanh b'ey ti' yinh culto, yalni eb'naj hulik'o tu' tzet isxahan-il ay eb'naj hawu. Wal tinanh xin, kaw chiwalan tawet ta chalahiko hakolwa yinh eb'naj yet chito eb'naj yinh isb'el, haka' choche isk'ul Komam Dios ha' chawatx'e. ⁷Eb'naj juxhta tu', ha' Istzoti' Komam Jesús chi'ek' eb'naj yala'k'oj, machi nino kolwal xin chisq'an eb'naj tet anma maxhto ayoko yul isq'ab' Komam. ⁸Wal xin to kaw yilal kokolwa yinh eb'naj, hak tu' xin hakojtam hanhhunonh lanhan komunla yinta eb'naj yet chi'ek' eb'naj kuywal tu'.

Hunteq'an machiswalil iswatx'e naj Diótreres

⁹Wuxhtaj, xatik'a watojan hune' wuman teyet makex ayexxako yul isq'ab' Komam Dios b'ey tu'. Yaj wal naj Diótreres xin, kaw chako isb'a naj iswi'ehalo texol. Waxanhka hanta tzet chiwaltojan, yaj kaw machi yelapno ye yul sat naj. ¹⁰Yuxin hayet chinapnihan b'ey tu', chintzotelan tet naj kat walnihan istx'ojal naj tet, yuto chi'ek' naj yala' koq'umalanh chalni naj leq'ti'al jinhanh teyet. Maxhnhetaj tu', to mach chischahpaxo naj eb'naj jetb'ihanh chi'apni b'ey tu', yaj tato ay eb'naj juxhta chichahni eb'naj xin, kaw chikachwa naj yinh, kat xin yinilo naj eb'naj texol.

¹¹Hach wuxhtaj kaw xahan ayach wuhan, mach chawute hab'a haka' anma kaw machiswalil chiswatx'e. Wal xin haka' eb'naj juxhta kaw k'ul isb'eyb'al, hak tu' chawute hab'a. Yuto ha' mak hanhe isk'ulal chiswatx'e, ha' chalniloj tato yetxa Komam Dios yehi. Wal mak machiswalil chiswatx'e xin, ha' chalniloj ta maxhto ohtab'ilo Komam Dios yu.

Isk'ulal iswatx'e naj Demetrio

¹²Wal juxhta Demetrio, kaw sunil eb'naj juxhta chalni tato kaw k'ul isb'eyb'al naj, chiyalnipaxoj tato kaw yijem chiyute isb'a naj yinh kuyb'anile kaw yel chala. Hakonhpax tu'an chijalanh tato kaw k'ul isb'eyb'al naj yul kosatanh. Kaw heyotaj tato ha' isyelal chijalanh.

Chalto ya' Juan ta chil isb'a ya' Gayo

¹³Kaw hantanheto tzet kaw chiwoche wala'tojan tawet, yaj kaw mach chiwochehan chintz'ib'nhetojan yul hum ti'. ¹⁴Yuto kaw ayxako yinh ink'ulan intohan kaxhintuklenojan, hato yet tu' kat kam walnihan yaq'b'ilxa tu' tawet. ¹⁵Kaw chawil hab'a b'ey tu'. Chisq'amb'en eb'naj juxhtaj ay b'ey ti' hanik' haweh b'ey tu' yinh hakawil, kat xin hawalnipaxo tet eb'naj juxhta b'ey tu' ta chil isb'a eb'naj. Hal tet eb'naj yinh hununtajil inq'ana'an.